



A lokisetse Morena Sechaba se phethehileng (Luka 1,17)

Tel: 28 350 466/ 62600983 (WhatsApp)

M5.00

MOELETSI OA BASOTHO

PARARE DOMINO PLEBEM PERFECTAM



Monamoli o loma
bebebe


5

E keteka le metsofe

6



www.moeletsioabasothe.co.ls



Re se re fumaneha ho marangrang

Email: newsroom@moeletsioabasothe.co.ls
Tel: +266 28350466/ Whats app: 62600983

MOELETSI

Liketso li bua ho feta lipolelo

Khahlo ea litsela le marokho ke pontšo ea 'muso ea ho ntlafatsa moruo oa naha, phano ea litšebeliso le boitlamo ba ho fetola bophelo ba sechaba sa Basotho ho sa tsoelele hore na se phela karolong efe ea naha ea bo rona.

Sechaba sa Ha Matlali le Lebakeng seterekeng sa Qacha's Nek, hona moo ho kileng hoa ba le tona-kholo ea lilemo, ke hona hlathe e lelekisang tsebe, haele mona tsela e il'lo lokisoa le ho kenngoa letšoana. 'Me ke mane moo sechaba sa moo tsela e tlang ho feta teng se tlang ho fumana mosebetsi. Taba ee e reng ho uena o le 'mali? Na hoo ha ho supe hore phokotso ea bofuma ba tlhokahalo ea mesebetsi ea theoha?

Ho bua haholo ha hona thuso, empa o sa bontše ka liketso. Ho khale litsela li ahoa moeang mona, ho holo e le ho phethola lekote feela. Ketapele ea 'Muso o litulong ho bonahala ba tšoare ka thata hobane motho o bona o pota Lesotho lena kaofela, esita le mabalane ho qobile lerole ho sa qellanoe, sechaba se itokisetse litsela ka matsoho ho sa sebelisoa mechine, mol-emong oa hore bana ba fumane liea ka maleng.

Taba ena ea tsela ea seterekeng sa Qacha's Nek e tl'o boela e nyolla bohahlaoli, e akofisa maeto, e holi-sa moruo, khoebo le khoebisano, ho fihlisa thepa mebarakeng ha bobebe. Setereke sena se na le libaka tse ntle haholo tse ka khahlang bahahlaoli ho li etela, joaloka sebaka sa 'Melikane, le ho tla boha liphoofolo tse hlaha tse ntse li fumaneha sebakeng se joalo le lehaha la Baroa.

Haele tabeng ea motlakase ruri re bona hantle hore 2030 Mosotho e mong le e mong o tla be a fumane matlakase, ho latela ka moo Lekala Matla le nkileng ka sekaja ka teng. Re lumela hore lea se nang mahlo oa bona. Kaha bohanyetsi pusong ea sechaba ka sechaba bo teng, bo lula bo hanyetsa le lintho tse ntle, ho sa tsoelele hore na lintlafatso li etsoa motseng oa habo kapa che. Ha hona mohlang ba thabelang lintlafatso kapa tsohle tse ntle tse e tsuoang ke ba litulong. Che! Khang sala moo.

Hlomphe moriri o mo putsoa o tló tseba ho phela halelele o bone tse ling tse ngata lilemo. Mokhatlo oa Help Lesotho o tsoile letšolo ka tlhokomeliso, ka tlhek-efetso ea batho ba holileng, 'me hona ke tsotello ea bohlokoa. Ho banaha batho ba hlolileng ba se ba sa fuoe tlhokomelo joaloka pele, le khethollo e ntse e ja setsi hohle moo ba lulang teng. Batho ba holileng ke letlotlo la sechaba, ba holisa bana le ho fana ka tataiso ho bacha mabapi le ho hlola mathata a bophelo. Metsotse ena ea rona e hleketsoa maikutlong, le 'meleng, le ka lichelete tsa bona. Hape ha ba fuoe monyetla oa ho hlaha maikutlo a bona litabeng tse ba amang.

Likolo tse ling kahar'a naha ho bonahala li ikakhetse ka matla a maholo ntlheng ea ho itlhalisetsa mero-ho le litholoana. Re bona li phethisa litaba tsane tsa Rabasotho le ho mo tšehetsa ka ho sebetsana le phe-po e nepahetseng. Ha barutoana ba sekolo ba sa je hantle, ba ke ke ba tsepamisa maikutlo a bona holima seo litichere li ba fang sona, hobane joale ba tla be ba tšoare ke tlala, e be joale ha ba ithuti hantle, qetello sephetho e be se sa khahlang.

LHDA ruri e tšoare hantle morao tjena. Morero o qa-lile pele ka ho fana ka thuto ho baahi bohle ba anngo-eng ke letamo la Polihali, 'me ke mona joale sechaba se imona monoana ka chai eo ba e fihletseng, 'me ba roakile tlala. Se fe Mosotho hlapi, empa mo rute ho e tšoasa, ke seo le se entseng ka hona rea le thoholetsa. Lipelaelo tsane e se e tló ba pale ea maobane, lipuisa-no ke taba ea bohlokoa le ho ruta sechaba ka boitjaro molemong oa boiphiliso leho itlhalisetsa.

MOLIMO A BOLOKE LESOTHO LE BASOTHO

Retro sa palliative care se qala tšebetso

Nthabeleng Seitlheko

Ka lilemo tse ngata malapa a mangata Lesotho a 'nile a shebella barat-uoa ba ona ba tšoeroeng ke mofetše le mafu a mang a sa foleng ba utloa bohloko malapeng ntle le tšehetso e

bakuli ka matsoho ha ba feta linakong tse thata tsa bophelo."Ho boletse Lephe-ane.

O hlositse hore tlhokomelo ea 'palliative care' ha e folise lefu, empa e fetola tsela eo mokuli a phelang ka eona nakong eo a setseng le eona."Ha motho a ntse a e-na le nako ea bophelo e setseng, nako eo e lokela

Tlhokomelo e tla fanoa ke 'Starlight' e bolela seriti, matšelisano le ho netefatsa hore ha ho motho ea tsa-maeang tseleng ena e thata a le mong." Ho boletse Ntlhakana.

Ngaka Benjamin Nkoyi oa Sepetlele sa Queen 'Mamohato Memorial Hospital, o itse setsi sena se tla thusa haholo malapa a mangata,



lekaneng, kapa tlhokomelo e khethelileng. Empa ho tloha ka Phupu selemong sena, bakuli bana ba tla qala ho fumana tlhokomelo e ba fang seriti, matšelisano le tšepo.

Sena se tla etsahala ka ho theoa ha Starlight of Hope Hospice, setsi sa pele sa mofuta ona Lesotho, se tla fana ka tlhokomelo ea 'palliative care' ho bakuli ba mofetše le mafu a mang a sa foleng.

Ka la 16 Phupjane monon-goaha, setsi sena se amohetse likoloi tse fanoeng ke Standard Lesotho Bank le Maseru Toyota mohahong oa sona o mocha Maqhaka Letsatseng.

Motheti oa Starlight of Hope Hospice, Mofumahali Malichaba Lepheane, o re likoloi tsena li tla ba thusa ho fihlela sepheo sa bona sa ho isa litšebeliso ho bakuli le malapa a bona.

O boletse hore toro ena e ne e ke ke ea phethahala ntle le tšehetso ea batho le likampani tse fapakaneng tse ileng tsa fana ka nako, lisebelisoa le thuso ea lichelete."Re tšepisa kutloelo-bohloko le boitelo. Re teng ho tšoara malapa le

ho tlala seriti le matšelisano eseng bohloko feel."A rialo.

Hlooho ea Lefapha la Brand le Marketing ho Standard Bank, Palesa Ntlhakana, o itse Standard Bank hammoho le Econet le Vodacom e bile balekane ba ka sehloohong ba morero ona, ha Maseru Toyota e thusitse ka koloi.

O boletse hore ba motlotlo hore karolo ea pele ea morero e phethetsoe 'me ba thabetse hore litšebeliso li tla qala ka Phupu."Ntle le ho utloisa mokuli bohloko, mofetše o ama lelapa lohle, bahlokomeli le sechaba.

kaha lipetlele li tobane le palo e ntseng e eketseha ea bakuli ba hlohang tlhokomelo e khethelileng."Sepetlele sa rona rena le bakuli ba bangata haholo. Starlight of Hope Hospice e tla re thusa ho tsamaea le malapa ao tseleng ena e boima," ho boletse Dr. Nkoyi.

Ho buloa ha Starlight of Hope Hospice ho tšoaea mohato oa bohlokoa ntlafatsong ea tlhokomelo ea bakuli ba mafu a sa foleng Lesotho, ho tlisa tšepo e ncha ho malapa a mangata a neng a tobane le bohloko le ho hloka tšehetso.

LAA LAND ADMINISTRATION AUTHORITY NOTICE OF LOST LEASE

NOTICE is hereby given that I intend to apply for a certified copy of a registered **Title Deed/Lease** to immovable property registered Under No. **14322-487** on the 9 December 2013 in favour of **LIEKETSING MARIA RAMAHLELE** in respect of Every right or interest on and to the building(s) and other developments express or implied in certain Plot No. **14322-487** situated at **HA PAKI, MAZENOD, MASERU DISTRICT** on Plan No. **14322** as held by Chief Surveyor.

All persons having objection to the issue of the said copy are requested to lodge them in writing to the Land Registrar **within three weeks** from the last publication of the notice.

ADDRESS:

Land Registrar
Land Administration Authority
Lerotholi Road
P.O.Box 11856
Maseru 100

APPLICANT'S NAMES AND ADDRESS:

Lieketseng Ramahlele
Mazenod Ha Paki
P.O. Box 49
Lesotho

Contacts: +266 28350 466

62600983 WhatsApp

Email: newsroom@moeletsiobasotho.co.ls

Sales and Marketing: (+266) 28 350 466/ 57396597 (WhatsApp)

MOELETSI oa BASOTHO
A LOKISETSE MORENA SECHABA SE PHETHEHLENG (LUKE 1:17)

EMAIL: editor@moeletsiobasotho.co.ls

sub-editor@moeletsiobasotho.co.ls

Mohale Lehlohonolo (Sub-editor)

(+266) 58 771 507 / 62 771 507

Journalists

Nthabeleng Seitlheko

Tšelisano Thakholi

Production Desk: 'Mateele Liqa

57 665 038/ 68 216 271

58 540 853/ 63 480 404

Marang-rang ke karolo ea ntlafalo

Nthabeleng Seithleko

Ha lefatše le ntse le fetoha ka potlako ka lebaka la mahlale a morao-

ke hore litsamaiso tse ling tsa tlhahlobo li ntse li shebane haholo le ho hopola lintlha, ho e-na le ho lekola bokhoni ba baithuti ba ho sebelisa tsebo eo ba ithut-

tle ea tlhahlobo ea thuto.

Litsebi li re haeba mekhoa ena e ka sebelisoa ka katleho, e ka thusa ho aha mekhoa ea thuto e amohelang bohle, e fanang ka menyetla e lekanang ho baithuti bohle, le ho ba lokisetsa bokamoso bo sumetsoang ke mahlale a morao-rao.

Prof. Paseka Mosia o itse nt'setsopele ea 'nete ea thuto e fumaneha feela ha moithuti a khona ho bontša,

hahlobong. "Haeba tlhahlobo e sa kenyeletse bophelo ba mahaeng, bophelo boo bo tla eelloa ka phaposing ea ho ruta." A lemosa.

A re ha Afrika e ka boroa ho Sahara e ntse e e-na le karolo ea 30 lekholong ea bana ba limilione tse 258 ba sa keneng sekolo lefatsheng ka bophara, litlamorao tsa seoa sa COVID-19 li etsa hore lipheo tsa selemo sa 2030 li potlakele ho fihlilleha.

hahlobo e sa khone ho bua puo, setso le bophelo ba moithuti, e ke ke ea bitsoa tlhahlobo, empa e tla ba mokhoa oa ho mo qhelela ka thoko.

Leha ho le joalo, ba bang ba neng ba le lipuisanong ba lemosa hore lipheto ho li hloka lichelete le litsamaiso tse matla. Mookameli oa Litlhahlobo le Tlhahlobo ea Thuto Namibia, Mofumahali Clementine Tsumis-Garises, ea nang le boiphihle-



rao le Bohlale ba Maiketsetso (AI), litsebi tsa thuto li re e 'ngoe ea litharollo tsa ho ntlafatsa boleng ba thuto ke ho fetola mekhoa ea tlhahlobo, hore e se ke ea shebana feela le litlhahlo-

ileng eona. Sena se etsa hore baithuti ba qete sekolo ba sa hlomelloa ka botlalo bakeng sa 'maraka oa mesebetsi kapa ho iketsetsa menyetla ea bophelo.

Molula-Setulo oa Lekhotla la Litlhahlobo la Lesotho (ECOL), Dr. Letzadzo Kometsi, o itse tharollo ke ho sebelisa tlhahlobo e le sebelisoa sa ho ntlafatsa boleng ba thuto, eseng feela ho fana ka limaraka. O boletse hore tlhahlobo e ka thusa ho supa moo baithuti ba hlohang tšehetso teng, le moo litsamaiso tsa thuto li hlohang ntlafatso.

Baemeli ba nkileng karolo mokeng ba lumellane hore tšebeliso e nepahetseng ea mahlale a marang-rang le AI, e ka thusa litichere ho fumana leseli le potlakileng mabapi le tsoelo-pele ea baithuti, e leng se ka thusang ho fana ka tšehetso pele mathata a hola.

Letona la Thuto le Koetliso Prof Ntoi Rapapa, ha a ne a bua le baemeli sebokeng sa bo15 sa Mokhatlo oa Afrika Boroa oa Tlhahlobo ea Thuto (SAAEA) se tšoareletsoeng Maseru, ka la 15 Phupjane monongoaha.

Ba boletse ba khothalelitse tšebeliso-'moho lipakeng tsa linaha tsa tikoloho e le mokhoa oa ho arolelana boiphihlele le mekhoa e me-

lo ba lilemo tse 40 tabeng ea netefatso ea boleng ba thuto, o itse puso e ntle le lichelete li ke ke tsa aroloa tabeng ea toka thutong.

Prof. Mosia o boetse a hatelletse bohlokoa ba ho kenyelletsa bohle thutong ho feta feela ho ba ngolisa likolong. O itse ho isa bana sekolong feela ha hoa lekana, a kopa hore puo ea matsoho e amoheloe ka molao le ho rutisoa ka botlalo, e le

lo ba lilemo tse 40 tabeng ea netefatso ea boleng ba thuto, o itse puso e ntle le lichelete li ke ke tsa aroloa tabeng ea toka thutong.

O itse ho bohlokoa hore baithuti, litichere le lihlooho tsa likolo ba kenngoe ka kotloloho lipuisanong tse amang bokamoso ba thuto. O re ho kenyelletsa bohle ba amehang ho ka thusa ho hlahisa maano le mekhoa ea tlhahlobo e arabelang litlhoko tsa baithuti ba mehla ena.

Baemeli ba nkileng karolo mokeng ba lumellane hore tšebeliso e nepahetseng ea mahlale a marang-rang le AI, e ka thusa litichere ho fumana leseli le potlakileng mabapi le tsoelo-pele ea baithuti, e leng se ka thusang ho fana ka tšehetso pele mathata a hola.

O itse mekhoa ena e lokele ho hokahanya litlhahlobo le maemo a bophelo le boitsebahatso ba baithuti, ho fapana le ho latela mekhoa ea khale ea bokolone e sa eleng hloko Basotho, bana ba mahaeng le ba nang le bokooa.

Prof. Sarah Howie Mookameli oa Setsi sa Lipatlisiso sa Univesithi ea Stellenbosch hape e le setho sa sekolo ea thuto ea mahlale Afrika Boroa, o tšehelitse maikutlo ana ka liphuputso tse fetang 80 tsa litlhahlobo tse kholo tsa thuto.

"Litlhahlobo li lokela ho bontša maemo a bophelo a sebaka seo li sebelisoang ho sona. Re tlameha ho botsa hore na ke mang ea etsang qeto ea hore na ke tsebo efe ea bohlokoa e kenngoa lenaneong la thuto." Ho boletse Prof. Howie. Prof. Mosia o qotsitse liphuputso tse entsoeng Lesotho, tse bontšang hore litlhahlobo li susumetsa haholo mokhoa oa ho ruta, kaha litichere li ruta haholo ho latela se tla hlaha litl-



hore bana ba sa utloeng litsebang le bona ba khone ho bontša seo ba se tsebang.

Ha Maseru e ne e amohela puisano ena ea tikoloho, Dr. Thilala o ile a akaretisa maikutlo a kopano ka ho re: "Haeba re sa laole lihlahlobo le lichelete ka nepo, ke mang ea tla re tšepa ho ruta bana ba bona?"

O itse molaetsa oa Prof. Mosia o tobane le teko e tšoanang, kaha haeba tl-

baneng le boleng le taolo e nepahetseng ea lisebelisoa bo tsoanetse ho ba motho oa thuto. Puso e ntle ke karolo ea bohlokoa ea boleng ba thuto." Ho boletse eena.

The Office of **TJ General Dealer (Pty)Ltd** Reg. Number 56709 writes to inform shareholders and the public at large of its decision to move its registered addresses with effect from the **16th June 2026**.
Old address Caldon road P.O. Box 223 Butha-Buthe 400 Lesotho
New address Sir Seretse Khama Road Ha 'Mathata P.O. Box 567 Mafusoe 350

MOELETSI O TŠEHETSA BACHA

Tšelisong Thakholi

Lintho tse ntle li'a iketsetsoa, sena re se bona ha mocha ea lilemo li 21, Thato Ramokhethi, oa Qoaling seterekeng sa Maseru, a hlalisa etsa thepa e ntlehali, mesamo e khabisitsoeng ka lipalesa, mealo ea bethe le masela a mefuta e fapakaneng a khabisang malapeng le meketeng. Mocha enoa o se a tumme ka ho etsa thepa ena ebe oa e rekisa. Ausi Thato o nyan-tse tsebo ena ho batsoali ba hae kaha bobeli ba khoe-bong e tšoanang.

MOSEBETSI OA HO ROKA

Ho tloha kholong ea ka esale ke rata ho roka kaha ke hotse ke bona batsoali baka ba ntse ba etsa mosebetsi ona 'me le 'na ka rata hoba etsisa. Ke qalile ka bosoasoai empa ka hlokomela hore ehlile ke na le talenta. Ke qalile hantle ke le lilemo li 12 ho ithuta ho khabisa masela ka lipalesa. Ke ne ke etsa masela ana ao ho khabisoang lisofa ka ona, ebe ke kena ntlo le ntlo kea a rekisa hona motseng mona. Ka nako e 'ngoe ke thuse batsoali ho rekisa ka 'marakeng khoebong ea lapeng.

KHOEBO EA EMISA

Khoebo ena ea ka eo ke e qalileng bonyenyaneng e ile ea ka ea emisa nakoana nakong eo ke neng ke ea

Sekolong se Phameng sa Lesotho, kaha ke ne ke se ke phathahane haholo ke mosebetsi oa sekolo. Kamor'a moo ka fetela Sekolong sa Lithuto tsa Mahlale sa Limkwokwing, ka fihla ka etsa ona mosebetsi oa ho roka le ho khabisa. Hoba ke qete lithuto tsa ka ke ile ka atamela e mong oa metsoalle ea ka eo e leng seroki, rea ikopanya ka litsebo tsa rona ho etsa mesamo le masela a khabisang, re ntse re sebetsa 'moho ho fihlela kajeno. Re ile ra eketseha re se re ikopantse rele bane.

THEKISO EA THEPA

Kamehla ha re qeta ho rekisa re arolelana phaello khoeli le khoeli ebe re rekisa lihlahisoa tse ling. Re qalile re sebetsana le ho rekisetsa likhoebo tse peli le batho ka bo mong, empa hajoale re se re rekisetsa likhoebo tse tharo. Re boetse rena le bareki ba bang ba bararo naheng ea Afrika Boroa. Joalokaha ke boletse qalong re ne re etsa masela a khabisang, ra etsa mesamo empa ha nako e ntse e tsamaea ra qapa mefuta e metle haholo ea likharetene, 'me khoebo e ntse e tsamaea hantle kaha re se re bile re e kopantse le ea ho etsa mabanta, lintho tseo ho hokeloang linotlolo le mekotla ka matlalo.

'MARAKA LE LIKATLEHO

'Maraka oa rona o moholo oo re neng re o shebileng ha re qala ke oa batho ba sebetsang ka liofising tsa 'muso, batho ba khabisang ka masela meketeng ka ho

fapakana ha eona le batho ka bo mong. Ke bona re sa phoqeha ho hang hobane le kajeno batho bao re neng re ba shebile esale ba ntse ba re tšehelitse. Ho feta moo re ile ra tlameha ho eketsa thepa ha re fumana bareki ba bang kante ho naha, e leng ea tse ling tsa likatleho tsa rona tse kholo.

LIQOLOTSO

Liqholotso tsa rona ha li ngata haholo, empa e kholo eo re kopanang le eona ke thepa eo re e sebelisang kaha e theko e boima haholo le lintho tse khabisang. Sena se re tlama ho rekise

ka le reng ke ea boemo bo holimo. Bothata bo bong ke bareki ba beheletsang thepa eba ba nka nako e telele haholo ho e lefella. Ha pele re ne re ile ra kolotela bareki ba bang, 'me eaba ba re phoqa, ke ha re tla sebelisa mokhoa ona oa hore moreki a beheletse ebe h'a qeta ho lefa o se a nka thepa.

TABA-TABELO

Taba-tabelo ea rona e kholo ke ho bona khoebo ea rona e hola e se e le boemong bo holimo haholo, 'me thepa ena e se e rekisoa mose. Hape re batla ho iphumana

KELETSO HO BACHA

Rona re khothaletsa bacha boikopanyo le ho arolelana litsebo tseo ba nang le tsona. Re boetse re etsa keletso ho bacha ba ntseng ba le likolong ho se etse lithuto feela tsa hlooho kapa tse ka ba thusang ho ea sebetsa kahara liofisi, empa ba kenyeletse le lithuto tsa mesebetsi ea matsoho e le hore haba qeta ho phethela lithuto tsa bona ba tle ba tsebe ho iqalla likhoebo tsa bona. Rena le bacha ba sa kenang sekolo empa ba ena le lineo tsa tlhao. Bacha ba joalo re se ke ra ba siea



thepa ea rona ka litheko tse boima. Le ha ho le joalo, bareki ba utloisisa tšebetso ea rona 'me ba ntse ba thabela thepa ea rona haholo

re se re ena le feme kaha hajoale re ntse re sebeletsa sebakeng se senyenyanane haholo.

mora ba kenelle boikopanyong ba lona kaha litsebo tseo tsa bona li bohlokoa haholo ho holisa le ho matlafatsa boikopanyo ba lona.



Monamoli o loma bebebe



Nthabeleng Seitlheko

O fisi ea Moemeli oa Littlelebo e phatlalalitse hore e tla qala lipatlisiso ka bo eona mabapi le tsamaiso, tšebetso le litefo tsa lipenshene tsa batho ba

boliileng, kamora littlelebo tse tsoelang pele tsa tieho ea litefo tsena.

Polelong ea hae, ea la 16 Phupjane monongoaha, Moemeli oa Littlelebo, tsa Sechaba Adv. Tlotliso Polaki, o re ofisi ea hae e hlokometse ka matsoenyeho a maholo litlaleho le littlelebo

tse ntseng li eketseha mabapi le tiehiso ea litefo tsa lipenshene tsa batho ba hōlileng le lithuso tse ling tsa sechaba.

O boletse hore littlelebo tse amohetsoeng li bontša hore bajalefa ba bang ba qeta nako e telele, ba emetse ho fumana lithuso tse re-

retsoeng ho ba thusa ka litlhoko tsa mantlha tse kang lijo, tlhokomelo ea bophelo bo botle, lipalangoang le litšenyehelo tse ling tsa bophelo.

Polaki o supile hore bothata bona bo ama haholo lihlopha tse tlokotsing sechabeng, ho kenyeletsa batho ba hōlileng, batho ba nang le bokooa le malapa a futsanehileng. O boetse a hopotsa sechaba hore ka selemo sa 2024 ofisi ea hae e ile ea etsa lipatlisiso tse tšoanang ka lebaka la mathata a amanang le litefo tsena.

O boletse hore boholo ba littlelebo tse amoheloang hona joale li tšoana le litaba tse ileng tsa hlahlojoa pejana, e leng se hlahisang lipelaelo mabapi le hore na likhothaletso le mehato ea tokiso e neng e khothalelitsoe e ile ea kengoa tšebetso ka botlalo kapa che.

Ka hona, lipatlisiso tse tlang li tla shebana le lisosa le boholo ba tieho ea litefo, katleho ea mekhoha ea ngoliso le netefatso ea bajalefa, boemo ba tsamaiso ea litefo, ho latela likhothaletso tsa pejana tsa Moemeli oa Littlelebo, hammoho le tieho ena e nang le eona ho

bajalefa.

O memme bajalefa, litho tsa malapa, mekhatlo ea sechaba, makhotla a sechaba le mang kapa mang ea anngoeng ke tieho ea litefo kapa mathata a amanang le tsamaiso ea lithuso hore ba fane ka tlhahisoleseling ofising ea hae.

O hatelletse hore mananeo a t'sireletso ea sechaba a teng ho sireletsa seriti sa botho le ho fokotsa bofuma, kahoo bajalefa ha ba lokela ho utloa bohloko ka lebaka la liphoso tse ka qojoang tsa tsamaiso.

Ho sa le joalo, pejana paramenteng, Letona la Tekano Bacha le Nt'setsopele ea Sechaba le boletse hore tieho ea litefo tsa lipenshene libakeng tseo ho leng thata ho fihla ho tsona, tse kang Poriking, Qabane le libaka tse ling, e bakiloe ke likhohola le linoka tse neng li tletse nakong ea lipula.

Letona le khothalelitse bajalefa ho ingolisa ho likampani tsa mehala e le hore ba ka fumana litefo tsa bona ka mokhoa oa marang-rang, e leng se ka thusang ho fokotsa tieho ea litefo nakong e tlang.

Bofuma bo fetoha pale ea maobane

Nthabeleng Seitlheko

Marelebohile Moloinyane (35) oa Lekhotla la Motse la Tosing, Seterekeng sa Quthing, a qala khoebo ea ho loha likatiba tsa Basotho, o ne a sokola ho hlokomela malapa a mararo ao a nang a a tšehetsa. Ka mochini o le mong feela o neng o sa tšepahale le ho haelloa ke 'maraka o hlophisitsoeng, bokamoso ba hae bo ne bo bonahala bo sa tsitsa. O boletse tsena, ka la 15 Phupjane monongoaha.

Ke e mong oa bajalefa ba Morero oa Ntlafatso le Boipheliso Metseng(EIP), o mo thusitseng ho fetola khoebo ea hae hore e be mohloli o tsitsitseng oa chelete. Ka tšebetso ea koetliso, boeletsi le chelete ea peo ea khoebo ea M5,400.00, o ile a reka mochini oa bobeli oa ho loha, a ntlafatsa lisebelisoa tsa hae le ho ithuta ho tsamaisa khoebo ka mokhoa oa boemo bo phahameng.

O re kamora ho fumana tšebetso ena, tlhahiso ea hae e ile ea eketseha haholo. Hona joale o rekisa

likatiba tse fetang 100 ka khoeli ho bareki ba tsoang Qacha's Nek, litereke tse ling tsa Lesotho le Afrika Boroa. O boetse o hirile batho ba bahlano ba tsoang motseng oa habo ho mo thusa khoepong.

'Marelebohile o re phaello ea hae e se e nyolohetse ho M20,000.00 ka khoeli, e mo nolofalelitse ho ntlafatsa maemo a lelapa la hae ka ho lokisa ntlo le ho kenya motlakase.

Letona la Tekano, Bacha le Ntšetsopele ea Sechaba, Mohlomphehi Pitso Lesaona, o itse morero ona ke katoloso ea Morero oa PSLP, o qalileng ka 2022, 'me o tla phetheloa ka 2027.

Letona le hlalositse hore sepheo sa morero ke ho thusa malapa a futsanehileng hore a tsoe bofuming, ka ho theha likhoebo tsa boipheliso, ho fumana mesebetsi le ho ntlafatsa mehlopi ea chelete.

Le itse Leano la Ntlafatso ea Naha la Bobeli (NSDP II) le Leano la Ntšetso-pele e Tsitsitseng la Machaba (SDG) li totobatsa bohlokoa ba ho theha menyetla ea mesebetsi le ho fokotsa bofuma, 'me morero ona o kenya letsoho ka kotloloho ho fihlella mesebetsi ena.

Mohlomphehi Lesaona o boletse hore 'muso o ikemiselitse ho tsoela pele ho phahamisa mananeo a fanang ka litsebo, koetliso le tšebetso ea lichelete e le hore Basotho ba bangata ba ikemele moruong.

O khothalelitse bajalefa ba morero hore ba sebelise menyetla eo ba e fumanang ka boikarabello, ba holise likhoebo tsa bona le ho thusa ba bang metseng ea bona ka ho theha mesebetsi.

Mongoli e Moholo Lekala lena, Thae Makhele, o re ho thakhola morero oa Ntlafatso le Boipheliso Metseng o fumaneng kahar'a morero oa PSLP ba phethetse morero oa pele Metsi Maholo seterekeng sa Mafeteng. O re ha se taba ea hore na chelete e kae, empa taba khohlo ke ho tseba tšebeliso ea eona. "Ho ea pheleha ho ea etsahala ho bohlokoa, 'me ke ho itumella ho tataisoa".

Mohokahanyi oa Morero 'Masechaba Nthunya, o itse morero oa Ntlafatso le Boipheliso Metseng ke morero o tšehelitsoeng ka lichelete ke Banka e Khohlo ea Lefatše, o qalile ka 2022 o tla fihla pheletsoeng ka 2027.

Morero o lokela ho fihlela malapa 1000, mokhahlelong oa bobeli o tli'o etelloapele ke World Vision. Mekhahlelo e meraro oa pele ke litaba tsa ntlafatso le boipheliso metseng, litsiane tse fanoang ke lekala li be le ponalletso le ho nchafatsa sesiu sa manane a malapa Lesotho (Nissa).O ikemiselitse ho fa Basotho bokamoso, e mong le e mong a kenye letsoho kholisong ea moruo le ho hlahisa mesebetsi bakeng sa ba bang.

Moemeli oa Banka ea Lefatše, Mafupu Mokoena, o itse banka ea lefatše e reretsoe ho thusa mebuso ka lintlafatso tseo ba lihlokanang, ba arolelane moruo, ba fokotse bofuma linaheng tse kaholimo ho 200 hore

sekhahla sa bofuma se fokotsehe.

Lekala lena le phamolelitse taba eo holimo hore Basotho ba fokotse tsela eo morero o re a mang ka eona.

Morero o ka ba tsoela molemo ha ba tsepamisetse maikutlo, ha hona motho ea qobelloang ho etsa lintho tseo a sa libatleng. Tsoelapele ho tšepahalla 'muso le ho tšepahalla bophelo ba bona.

Toloane Matekane ho tsoa lebatsoeng la Mantšonyane 72, o re taba ena thupelo e tli'o ba supisia tsela 'me chelete eo ba e filoeng e tle e tliise phetoho. O re ba lokela ho etsa mesebetsi eohle ea bona, eo ba itlametseng ho e etsa.



Help Lesotho e keteka le ba holileng

Nthabeleng Seitheko

Ka sepheo sa ho bontša tlhokomelo le lerato ho batho ba holileng, Mokhatlo oa Help Lesotho, o ketekile Letsatsi la Lefatše la Tlhokomeliso ka Tlhekefetso ea Batho ba Holileng Pitseng, London, seterekeng sa Leribe, ka la 15 Phupjane monongoaha.

Sehlooho sa mokete ona e ne e le "Ka nqane ho tlhokomeliso o etsa hore thibelo ea tlhekefetso ea batho ba holileng e sebetse." H'a bua le batho ba holileng, Motsamaisi oa Mananeo oa Help Lesotho, Sello Matsoso, o itse ke boikarabelo ba motho e mong le e mong ho hlokomela batho ba holileng, le ho ema khahlanong le mefuta eohle ea tlhekefetso.

O boletse hore batho ba holileng ba ntse ba tobana le khethollo malapeng a bona, metseng eo ba lulang ho eona le sechabeng ka kakaretso. "Ke boikarabelo ba rona bohle ho netefatsa hore sena se a fela le ho theha tikoloho e sireletsehileng bakeng sa batho ba rona ba holileng," ho boletse eena.

Matsoso o boetse a totobatsa hore batho ba holileng ke letlotlo la sechaba, kaha ba holisa bana le ho fana ka tataiso ho bacha mabapi le ho hlola mathata a bophelo. Ka lebaka leo, o itse batho

ba holileng ba lokela ho hlomphua, ho sireletsoa le ho hlokomeloa ka linako tsohle.

Leha ho le joalo, o bontšitse masoabi a hore batho ba holileng ba ntse ba hleketsoa maikutlong, 'meleng le ka lichelete ke malapa a bona kapa litho tsa sechaba. A re hangata ha ba fuoe monyetla oa ho hlahisa maikutlo a bona litabeng tse ba amang.

H'a bua ka bacha, o itse ba lokela ho etela batho ba holileng khafetsa, ba ithute ho bona le ho ba thusa mesebetsing ea bona ea letsatsi le letsatsi. "O tla

fumana tlhompheo eo u e bontšang batho ba holileng ha u se u holile le uena." Ho boletse eena.

Matsoso o ile a ipiletsa ho 'muso, mekhatlo, likereke le baetapele ba sechaba hore ba tsoele pele ho matlafatsa mananeo a sireletsang litokelo tsa batho ba holileng, ba ele hloko litlelebo tsa bona le ho sebetsa ho fumana tharollo ea mathata ao ba tobaneng le 'ona.

H'a bua ketsahalong eona eo, Ofisiri ea Tšehetso ea Maikutlo le Sechaba ea Help Lesotho, Felleng Lethola, o itse Lesotho le qalile ho keteka letsatsi lena

ka selemo sa 2022. O itse sehlooho sa selemo sena se bontša hore liketso tsa rona li tsoanetse ho bontša tšireletso le tlhokomelo ea batho ba holileng.

Mabapi le 'mala o pherese o sebelisitsoeng moketeng ona, o itse o emela tlhompheo eo batho ba holileng ba lokelang ho e fuoa ka lebaka la lintho tse ngata tseo ba li fihletseng bophelong.

H'a bua lebitsong la Sepelesa sa Lesotho sa Pitseng, Inspector 'Matumelo Maqokela, o itse ka litšoantšiso tse hlahisitsoeng ke batho ba holileng, mapolesa a hlokometse mathata

ao ba tobaneng le 'ona ka lipenshene tsa bona, moo chelete ea bona e utsuoang ke masholu kapa litloholo tsa bona. O boletse hore batho ba bangata ba holileng ha ba tsebe ho sebelisa litšebeliso tsa M-Pesa kapa EcoCash, e leng se ba behang kotsing ea ho hlaseleloa ke masholu. Maqokela o boetse a re mapolesa a hlokometse hore batho ba holileng hangata ba tsilatsila ho tlaleha linyeoe, kapa ba li hula hamorao, haholo hae-ba li ama litloholo tsa bona.

H'a bua lebitsong la batho ba holileng, 'Mataoana Masheoane o ile a leboha Help Lesotho ka tlhokomelo eo e ba fang eona ho tloha ha mokhatlo o thehoa. O itse ba ruile molemo o moholo mananeong a mokhatlo ona, kaha ba fuoa lijo habeli ka selemo ho thusa ho fepa malapa a bona, haholo bana ba likhutsana. Masheoane o itse batho ba holileng ba ananela letsatsi lena haholo, kaha le etsa hore ba ikutloe ba ratoa le ho ananeloa.

Mokete ona o ile oa tlotlosoa ka lipina le metjeko ea setso ea mokhibo le ndlamo hammoho le litšoantšiso tse fapakaneng. Moketeng ona ho bile teng, bo-nkhono le bo-ntate moholo ho hlaha litikolohong tse fapakaneng tsa naha ena.

Help Lesotho e thehiloe ka selemo sa 2004 'me e sebetsa Hlotse le Pitseng seterekeng sa Leribe.



LANFOD e tšoara likopano literekeng

Nthabeleng Seitheko

KMamekhatlo oa Mokhatlo oa Batho ba Nang le Bokooa Lesotho (LN-FOD) o ntse o tšoara likopano tse akaretsang tsa selemo (AGMs), bakeng sa mekhatlo ea litereke tsa Berea, Leribe, Mokhotlong le Butha-Buthe. Tsena li bile ka la 17 Phupjane monongoaha.

Motsamaisi e Moholo oa LNFOD, Rabasotho Ramoetsi, o boletse hore likopano tsena li reretsoe ho matlafatsa puso e ntle, ponalletso le boikarabelo mekhatlong e emelang batho ba nang le bokooa literekeng.

O re mekhatlo ena e ntse e fumana tšehetso ka Morero oa Gender and Disability in Practice Project (GADIP II) ho tloha ka Hlakubele 2025, ka sepheo sa ho ntlatfatsa tsamaiso ea eona le boetapele.

Ramoetsi o hlalositse

hore likopano tsena li fa litho monyetla oa ho fumana litlaleho tsa mesebetsi e entsoeng ke mekhatlo ea tsona, le ho buisana ka litaba tse amang batho ba nang le bokooa.

O boetse a re litho li tla hlahloba le ho amohelela litlaleho tsa lichelete tse hlahlobiloeng bakeng

sa selemo sa lichelete sa 2025/2026, e leng mohato oa ho khothaletsa taolo e ntle ea lichelete le boikarabelo.

Ka lehlakoreng le leng, Ofisiri ea Bobuelli le Litokele tsa Mantlha tsa Botho ea LNFOD, Thaabe 'Moso, o boletse hore likopano tsena li bohlokoa kaha li fa litho

monyetla oa ho nka karolo liqetong tse amang mekhatlo ea tsona.

O re likopano li thusa ho netefatsa hore litho li lula li tseba mesebetsi e etsoang ke mekhatlo ea tsona, hape li khona ho kenya letsoho mererong le mananeong a nako e tlang.

'Moso o boetse a re ho

kentsoe tšebetsong mehato e fapakaneng, ho netefatsa hore batho bohle ba nang le bokooa ba nka karolo ka botlalo likopanong tsena.

O tiisitse boitlamo ba LNFOD ba ho tsoela pele ho sireletsa litokelo tsa batho ba nang le bokooa, ho khothaletsa kenyeletso ea bona sechabeng le ho matlafatsa mekhatlo e ba emelang naheng ka bophara.



Tsela e ntlafatsa litšebeletso-TK

Tšeliso Thakholi

Khaho ea tsela ea letšoana e kpanyang libakatsa Ha Matlali le Lebakeng, ea bolelele ba 45km le khaho ea marokho ke pontšo ea 'muso ea ho ntlafatsa moruo oa naha, phano ea litšebeletso le boitlamo ba ho fetola bophelo ba sechaba sa Basotho ho sa tsotellehe hore se phela karolong efe ea naha. Tsena li boletsoe ke Tona-Kholo Samuel Matekane moketeng oa ho phethola lekote o bileng Lebakeng, Qacha's Nek mafelong a beke e fetileng.

Tona-Kholo o re morero o moholo oa khaho ea tsela ena ke ho akofisa maeto, ho holisa moruo, khoebo le khoebisano, ho fihlisa thepa 'marakeng habobebe le ho etsa hore naha e bohehe hantle le mokhoa oa ho tsa-maea o be bobebe.

A re khaho ea tsela ena e tliil'o boela e nyolla bohahlaoli kaha bahahlaoli ba tsoang Ha Ramatšelis, ba tla ba le thahasello ea ho fihla 'Melikane, ho boha botle ba tloleho sebakeng seo le ho boha liphoofole tse hlahala joaloka matsa a ntseng a fumaneha ka bongata sebakeng seo. "Ha tsela ena e phetheloa ke rata ho bona lipalo tsa bohahlaoli li nyoloha, le bophelo ba sechaba sena bo fetoha." A rialo.

A re haele mona ho se ho tla ba bobebe ho fihla 'Melikane, ke monyetla oa ho ruta baeti le bahahlaoli ka nalane ea lehaha la Baroa le fumanehang lipakeng tsa motse oa Thueleng le Ha Khanya nokeng ea 'Melikane. "Le hore na hantle polelo ena; "thotsela sa 'Meliane e kolla kae."

A ipiletsa ho makala a mabeli e leng la Bochaba le Bohlahlaoli le la Meru ho bona hore a thusa sechaba ka hohle hore se bone letlotlo lena la bohlokoa molemong oa ho iphelisa ka lona le ho bona hore tikeloho e baballehile, e le hore boieane ba tloleho bo teng sebakeng sena bo ntlafale. A qetella ka ho supa hore ka tsela ena 'muso o tliil'o bula menyetla e mengata ea mesebetsi le ho ntlafatsa mekhoha ea sechaba ea boipheliso le litsebo tsa bona.

Letona la Mesebetsi ea Sechaba le Lipalangoang, Mohlomphehi Matjato Moteane o boletse sechaba se neng se phuthehile ka bongata moketeng ona hore khaho ea tsela ena e tliil'o arabela taba-tabelo ea nako e telele ea 'muso ea ho ko-



panya litereke tsa Qacha's Nek, Thaba-Tseka le Mokhotlong. A re sechaba sa Ha Matlali se sotlehile nako e telele ka lebaka la tlhokahalo ea litsela. Ka hona tsela ena e tliil'o tloha Ha Matlali ho leba Lebakeng ho ea fihla lekhalong Ha Ramokatlela, e leng moo e tlang

honka mothinya o lebang Matebeng.

A re kahar'a eona ho tla ba le sekotoana sa tsela se tlang ho nka chelete e kalo ka M1.4Billion ka lebaka la bothata ba sona, ebe ho kenyeletsoa le marokho a mane e leng ba Tsoelike, Sejabatho, 'Melikane

le Senqu. A phethala ka ho bontša hore ha ho ntse ho lokisetsoa ho kopanya Qacha's Nek le Mokhotlong ba tla kopanya sebaka sena ho ea fihla Ha Makunyapane.

Ho sa le joalo, baahi ba Lebakeng ba isitse liteboho tse khetheleng ho 'muso oa Lesotho ka ntlafatso

ena ea khaho ea tsela e tliilo etsoa kahar'a lebatooa la habo bona. Ba tiisa hore matšoenyeho a bona a nako e telele a kang a ho timela ha batho ka lebaka la maemo a mabe a litsela le ho putlama ha likhoebo har'a tse ling e tliilo ba pale ea maobane.

Mpotjoane o etsa boitlamo

Tšeliso Thakholi

Letona la Matla le Lirafshoang Mohlomphehi Lejone Mpotjoane, o entse boitlamo kapel'a sechaba sa Lebatooa la Thabana-Morena, ba ho phethahatsa thomo ea Tona-Kholo ea hore ka selimo sa 2030 metse eohle ea Lesotho ebe e hoketsoe motlakase. O e ntse boitlamo bona meketeng o moholo oo Tona-Kholo Samuel Matekane a neng a nehelana ka phepele ea motlakase metseng ea Liphiring le Thabana-Morena seterekeng sa Mafeteng, mafelong a sa tsoa feta a beke.

O boletse sechaba sa Lebatooa leo hore metse eohle e ntseng e salletse

morao e kang; Khilibiting le mathoko a eona ka lebaka la boholo ba eona, e ahiloe morero o se o phethetsoe. A re ka tšebeliso 'moho le makala ohle a amehang 'moho le sechaba, e tliil'o hokeloa, e ntse e le karolo ea ho phethahatsa boitlamo ba hae. A tiisa hore le mabatooa ohle a e-s'o hokeloe motlakase, ba tliil'o matha lebelo la Ntšoeke ho bona hore sechaba se imona menoana ka ho fumantšoa phepele ea motlakase.

O boetse a etsa boitlamo ba hore ba tliil'o matlafatsa phepele ea motlakase ka sepheo sa ho hohela mofuta ea likhoebo tse khohle lefatšeng, e tlang ho hlahisa sechaba sa Basotho mesebetsi. "Ka hona, ha re matlafatsa phepele ea motlakase, re tla tseba ho theola litheko tse ntseng boima tsa ona." O boletse joalo, a bile a eketsa ka hore ke boikarabello bo boholo ba

hae, ho fehla motlakase o lekaneng kahare ho naha, e le hore Lesotho le tsebe ho itlhaahisa le ho rekisetsa linaha tse ling. "Re be re tsebe hore le litheko tse ntseng boima tsa motlakase re li shebe hore na re li theolela sechaba sa Basotho ka tsela ea mofuta ofe." A rialo.

Mokhethoa oa Lebatooa la Thabana-Morena No.56, ebile e le Letona la Temo le Kanetso ea Lijo Mohlomphehi Selibe Mochoboroane o supile hore ka nepo ha ba se ba qetile ho hokela lebatooa la Thabana-Morena ba tšoanela ho ea mabatooaeng a mang.

A re haele mona ba khantša ka holimo ho sehlabane sa Thabana-Morena, "takatso e ne e le hore ebe karolo ea morero ona o fihleletse metse ea Khilibiting le Qhoqhoane, empa likhakanyo tsa lichelete li bonahetse li sa fihlela tse ntseng re neng re li lebeletse.

Empa re hlokometse hore Letona le khabane le Mongoli e Moholo ba tšoare ka thata ho sebetsana le metse ena e ileng ea salla morao. Ha metse eo e se e hoketsoe motlakase re tla be re re o anetse libaka tsohle re ka tseba ho fetela pele." A rialo. A leboha le ho thoholetsa tšebetso ena e ntle e tliil'o tliisa liphetofo bophelong ba sechaba.

Molula-Setulo oa Lekhotla la Setereke sa Mafeteng, Tumelo Chitja o thoholelitse 'Muso oa Lesotho ka morero ona oa nehelano ea motlakase Thabana-Morena. A re motlakase o bohlokoa haholo kaha har'a tse ling o thusa ho loantša litlolo tsa molao, o thusa le tlhahisong ea mesebetsi e mecha. Empa a etsa sethahane sa hole se chekoa mohla letšolo, ka ho kopa Tona-Kholo hore ba hokeloe le metsi le ho ntlafatsa litsela tse bonahalang li senyehile haholo kahar'a setereke, ka lebaka la maemo a leholimo a lipula tse bileng matla.

Tona-Kholo Samuel Matekane o lebohetse sechaba sa Thabana-Morena ka phumantšoa ea motlakase, le ho ba hlokomelisa hore tebelo ea hae ka motlakase ona ke ho bona liphetofo bophelong ba bona tse tli-soang ke ona. A ba kopa ho hlokomela le ho baballa lintlafatso tse ntseng. Ke malapa a 991 a hoketsoeng motlakase lebatooeng la Thabana-Morena, 'me chelete e sebelisitsoeng e kaalo ka M42Millione.

MENZ

WIDE FORMAT PRINTING

We offer durable, affordable & quick turnaround wide format prints. We can provide multiple options for indoors and outdoor applications - as well as produce any size you can imagine

FOR YOUR FUTURE WE CARE

BANNERS

SIGNS

POSTERS

PRINTS

Call or whats App: +266 28350815/
22350224/ 68078124 (Whats app)

Mazenod PRINTING WORKS (Pty) Ltd

Prepare good People for The Good

LHDA e nanabetsa letsoho

Nthabeleng Seithleko

Ha khaello ea mesebetsi le tlala li ntse li ama malapa a mangata Lesotho, Morero oa Metsi a Lihlaba oa khaho ea Letamo la Polihali o bontša hore tharollo e ka fumanoa, ka ho ruta batho ho iphelisa le ho sebelisa menyetla ea temo. Litaba tsena li boletsoe ke Raliphlatso oa Morero ona Palo Mohlotsane ka la 17 Phupjane monongoaha

Ka la 15 Phupjane monongoaha, Morero oa Polihali ka Lefapha la Ntlatso ea Sechaba o ile oa aba lijo-thollo, mahe le meroho ho malapa a 40 a hlohang, metseng ea Malingoaneng, Tlhakola, Tloha-Rebue le Masakong.

Kabo ena e latela katleho ea temo e kopanetsoeng pakeng tsa sechaba le morero oa Polihali sebakeng sa Sekokong. Temong ena sechaba se ile sa nka karolo ea 60 lekholong ha morero oa Polihali le LHDA ba nka 40 lekholong ea tlhahiso, leha lisebelisoa le tšehetso ka litsebo e le tsa bona. Ka mor'a kotulo, karo-

lo ea lihlahisoa e ile ea lokisoa hantle 'me ea abeloa malapa a hlohang haholo.

Morero ona o fapane le lithuso tse tloaelehileng ka hore ha o fe batho lijo feela, o ba ruta ho li hlahisa. Mahe a abiloeng a tsoa polasing ea morero e Ha Ramonakalali, moo ho hlahisoang likhoho, mahe le meroho. Sebaka sena se sebelisetsoa

mekhoa e bonolo ea temo e ka ba hlahisetsang lijo le chelete. Morero o boetse o reretsoe ho thusa malapa hore nakong e tlang a fumane litsuonyana tse qhotsitsoeng sebakeng seo ho e-na le ho li reka hole.

H'a phethela Mohlotsane o itse sepheo ha se feela ho fana ka thuso ea nakoana, empa ke ho aha sech-

bophelo. Ha re fane feela ka lijo, re aha bokhoni ba hore malapa a tsebe ho iphelisa le nakong e tlang." A hlalosa joana.

E mong ho ba abetsoeng lijo, 'Mahlomphang Tšoeu oa lebatooa la Malingoaneng, eo e leng mohlolohali oa lelapa la batho ba 7 le litlolo tse 8, o itse lijo tseo li tla ba thusa haholo



ho koetlisa sechaba ka mekhoa ea temo e ntlafetseng. Baahi ba koetlisetsoa ho lema meroho, ho hlokomela likhoho le ho sebelisa

aba se ikemetseng se ka iketsetsang lijo le mehlole ea chelete. "Re batla hore batho ba bone hore temo e ka ba khoebo le mehlole oa

nakong ena e thata, eo a lekang ka hohle ho phelisa lelapa, joale le moruo o nyotobetse, kaha a rekisa joala ba matsoho. O re tlhahiso

ena e etsahetseng e fane ka tšepo ea hore ka matsoho a bona ba ka tseba ho phelisa malapa. "Ke leboha Morero, hobane thuso tsena li fihla nakong eo ke neng ke se ke phela ka ho kopa phofo malapeng, ke sa atlehe ho fumana mosebetsi oa letsatsi joaloka kamehla." Ke eena eo.

Mokanselara oa Malingoaneng, Moss Lengoasa o lebohlile tlatsetso e entsoeng ke morero malapeng a hlohang, kaha tlala e aparetse malapa a mangata. Taba ena ea tlhokahalo ea mesebetsi le batsoali ba sebetlang hole ke bothata bo boholo. A re hantle bophelo bo fetohile, kaha maemo a tlala a hloabaetsa linaheng tse 'maloa. "Khahlametso ena e fetotse bophelo ba bangata, hobane ha se batho bohle ba ka hiroang." Ke Lengoasa eo.

O re temo ena ea seahlole ke pontšo ea hore ho ea khonahala, ha batho ba ka sebelisa mobu oa bona ho iphelisa. A re o ntse a ema ka matla ho khothaletsa bohle ho kena temong ho sa natse maemo a leholimo hore bohle ba atlehe ho fepa malapa. "Ho fana ka tlhapi ho fepa motho letsatsi le leng, empa ho mo ruta ho tsoasa tlhapi ho mo fepa bophelo bohle."

Likolo li fetoha tharollo ea tlala

Nthabeleng Seithleko

Ha batho ba fetang 631,000 Lesotho ba tobane le khaello ea lijo, likolo tse ling li fetola masimo a tsona le a sechaba hore e be lirapa tsa tlhahiso ea lijo, li fana ka tšepo e ncha, le ho ema khahlanong le tlala, phepo e fosahetseng le ho tlohela sekolo ha baithuti. Tsena li hlaleletse puisanong le tse ling tsa likolo seterekeng sa Mafeteng, ka la 13 Phupjane monongoaha.

Neo Senai ea lilemo 17, Moithuti Sekolong se Phahameng sa Khoro, o re o ne a tloha lapeng a sa ja letho. Ka sekolong o ne a sitoa le ho tsepamisa maikutlo hobane mpa e ne e lla ke tlala. "Ka linako tse ling ke ne ke utloa ke hlajoa ke lihlong ha ke bona bana ba bang ba e-na le lijo, ke sena tsona." Ke ena eo.

O re bophelo ba hae bo qalile ho fetoha ha sekolo se qala serapa sa temo. Qalong o ne a nka mosebetsi oo e le mosebetsi o mong feela oa sekolo, empa hamorao a hlokomela hore o mo fa tšepo ea bokamoso bo betere.

"Kajeno ha ke sa bona temo e le mosebetsi oa

batho ba baholo feela. Ke bona e le ntho e ka fetolang bophelo. Ke ithutile ho lema meroho, ho hlokomela lijalo le ho hlahisa lijo. Ha ke fihla hae ke thusa lelapa lesoserapaneng, 'me ka linako tse ling re ja lijo tseo re li hlahisitseng ka bo rona." A rialo ka bososelo.

O re phetoho e kholo eo a e boneng ke hore h'a sa lula ka sekolong a nahana ka tlala. Hona joale o khona ho mamela, ho phetha mesebetsi ea hae ea sekolo le ho lora ka bokamoso.

"Toro ea ka ke ho qeta sekolo e be ke thusa lelapa lesa sechaba sa heso ho loantša tlala. Ha ke sheba serapa sena, ha ke bone meroho feela, ke bona bophelo le bokamoso bo betere."

Morero oa Basic Education Strengthening Project (BESP) o bontša hore mathata a tlala le bofuma a ntse a kenya letsoho hore bana ba bang ba tlohele sekolo Lesotho. Leha ho le joalo, bopaki bo tsoang ho BESP bo bontša hore ha bana ba fuoa tšehetso e nepahetseng, sekhahla sa ho tlohela sekolo se ka fokotseha haholo.

Morero ona o fokolitse sekhahla sa bana ba tlohelang sekolo maamong a



Grade 8 le 9 ho tloha ho 27% ka 2021 ho ea ho 19.8% 2025. Litsebi li re phepo e nepahetseng le tlhahiso ea lijo likolong ke tharollo hobane bana ba jang hantle ba tseba ho tsepamisa maikutlo lithutong.

Ho e-na le ho emela lithuso kapa ho tletleba ka litšenyehelo tse phahameng tsa lijo, Sekolo se Phahameng sa Khoro le Sekolo se Phahameng sa Mafeteng li sebelisa masimo a tsona ho hlahisa poone, meroho le lijalo tse ling tse thusang ho fepa baithuti, ho matlafatsa phepo e nepahetseng le ho ruta bana tsebo e ka ba thusang bophelo bohle.

Mongoli e bile e le tichere ea thuto ea temo Sekolong se Phahameng sa Khoro, Rethabile Sebele, o re sekolo sa bona se qalile merero ea temo ka 2022 ka sepheo sa ho kenya letsoho phepong ea baithuti. "Selemo le selemo re ntse re eketsa tlhahiso. Ka 2026 re atolositse masimo a rona hobane re bone hore

tlhahiso ena e thusa haholo phepong ea bana, le ho fokotsa litšenyehelo tsa sekolo." Ho boletse eena.

O re kaha temo e le karolo ea lithuto tse qobelloang sekolong, baithuti ba fumana monyetla oa ho sebetisa masimong le ho ithuta ka kotloloho mekhoa ea tlhahiso ea lijo. "Ha re rute bana feela ka buka, re ba ruta ho lema, ho hlokomela lijalo le ho utloisisa bohlokoa ba phepo e nepahetseng. Sena se ba fa tsebo eo ba ka e sebelisang le malapeng a bona." A rialo.

Tichere ea thuto ea temo Sekolong se Phahameng sa Mafeteng, Matšepiso Salemane, o re baithuti ba bona ba se ba ntse ba hlahisa poone le kabeche e sebelisoang ho matlafatsa tsebo ea bona ea boikoetliso. "Re batla hore bana ba utloisise hore lijo ha li qale lebenkeleng. Li qala mobung. Ha ba ithuta ho hlahisa lijo ba ntse ba le sekolong, ba ba le bokhoni ba ho ithokomela le ho thusa malapa a bona nakong e tlang." O boletse joalo.

Ho ea ka eena lenaneo lena le boetse le thusa ho fokotsa menyetla ea hore bana ba bang ba tlohele sekolo ka lebaka la tlala.

"Ka linako tse ling lijalo

lia senyeha kapa tsa hola hampe ka lebaka la khaello ea metsi. Sena se bontša hore haeba re batla hore merero ena e atlehe, re lokela ho tsetela mekhoeng ea temo e mamellang phepho ea maemo a leholimo e kang ho bokella metsi a pula, nosetso le temo e bolokang mongobo mobung," a hlalosa. Maphepo Lekaleng la Temo le Kanetso ea Lijo, 'Mabatebang Napo, o hlalositse hore ha bana ba ithuta ho hlahisa lijo ba sa le banyenyane, ha ba rue feela tsebo ea temo empa ba boetse ba fumana monyetla oa ho ja lijo tse nang le matsosai a nepahetseng a hlokalang bakeng sa kholo le bophelo bo botle.

"Ha re tsetela temong ea likolo, ha re hlahise lijo feela. Re tsetela bokamosong ba bana, re ntlafatsa phepo ea bona, re matlafatsa bokhoni ba bona ba ho ithuta ebile re aha sechaba se khonang ho iphepa nakong e tlang." Ho boletse eena.





TSA KEREKE

Kereke e mesaralong



Tšelisothakholi

Litlhaselo tseo e saleng li qala selemong sa 2017, tse nt-seng li etsetsoa balume-li ba Kereke e Katholike ka Leboea ho Profensi ea Cabo Delgado, ke lequloana la marabele a Islamic State Naheng ea Mozambique, li qeteletse ka polao ea Mobishopo oa Tikoloho e Kholo ea Beira, Mohlomphehi Citoro Afonso (54) ka ho thunngoa sefubeng a le lapeng ha hae hoseng ha la 6 Phupjane 2026.

Litlaleho li supa hore setopo sa Mohlomphehi Afonso se fumanoe lipakeng tsa matlo se le kahara lekoaliba le tšabehang la mali. Mobishopo Afonso har'a a mang a makhabane a hae, o tlahlea e ne e le motho ea nang le boikokobetso, boinehelo bo tebileng mosebetsing oa hae oa bolisa le lithuto tsa hae tse matla mabapi le ho laba-labela khotso le bonngoe.

O ne a boetse a khethilo e le motsamaisi e mohlolo oa baprista le baitlami ba Tikoloho e Kholo

ea Beira, kamor'a ho nka sebaka sa Mobishopo Chaodio Zunna ea ileng a ea phomolong ka la 10 'Mesa monongoaha ka lebaka la ho khathatsoa ke bokulo. Babishopo ba ipilelitse ho bakriste ba Kereke e Katholike ba tlahlehoang ba se ba phela bophelo ba linonyana ho khoba matšoafu, ho boloka khutso, ho tiea tumelong le bonngoe ba Kereke. President ea Naha ea Mozambique Daniel Chapo o tlahlea le eena a rometse me-laetsa ea matšelisano ho

Kereke ka polao ena e sehloho.

Polao ena e behileng Kereke e Katholike le balumeli ba eona tlas'a tšabo le tsitsipano e kholo, e tla khoeli kamor'a hore lequloana lena la Islamic State le hlasele ka matla Dioceses ea Pemba e kenyeletsang liparish le likereke tsa eona. Litlaleho li supa ha bo-ralipolotiki ba mekha ea bohanyetsi le bona ba kentse letsoho litlhasel-ong tse.

-CISA News Afrika-

Thapelo ea Basotho

'Mopi, Hlahlamacholo, Ramaseli, Rammoloki Atla li maroba, Atla li marotholi a pula, Atla li tšoeu tsa Rammoloki, Li tšoeu ke ho bopa masea, Hobane bohle re 'mopo le mosebetsi oa matsoho a ona. Hlahlamacholo hlahla metsi o'a etse keleli ea sehla sa Mariha, Hobane ka keleli u nchafatsa lichaba teng, Lichaba li tsoang ho uena 'mopong, Li tlang ho boela ho uena meahong. Ba meolimeololo, ba lumang lingope ho theleha. Ntšang tšoeu le nehe 'Mopi le tle le bone ha 'Mopi o thaba, Hobane Baholo-Balimo bona ba thabela likhalapa. Ba re ho be ho soeu, ho be malola, Ho be hele-hele pele le morao. Ho iloe kae ke Bo-ntate-moholo le Bo-nkhono ho sa keng ho khutloa, Ho iloe ha sekoti ha se tiale. 'Maakane joo! Ka 'Mopi ra le bona.

'Mopi oa Ramosholu-shololo litsohali Bo-nkhono ke bana ba labalabela matlala. Matlala b'a bona ka'ng a anetse, b'a bona ka ho theha mekhanya liphatleng tsa bona. Malataliana-tsela ngoana Rae e moholo ke mang, pitsana ha e na khobe, le e 'ngoe ha e na khobe. Qhaqholla u re qiti! Moshanyan'a sankatana le kholumo-lumo. Ho iloe kae ke bo-Mmabana, ba ile masimong.

Ba siile masea ka liotloaneng. Liotloana tseo ha li hole li sireletse masea. Ka bona Bo-ntate-moholo le Bo-nkhono ba lutse ka shoalane mollong le litlohotloholoana tsa bona ba li etsetsa litšomo tse monate;

Bo-limo le Tselane ka ba ka utloa ha ba ba etsetsa lillotho tse monate; bo-mmenthele o hlotse baruti.

Leseli! Khanya!

2025-2026 SELEMO A

SONTAHA SA 12 HAR'A SELEMO



Jeremia 20:10-13
Pesalema 68
Ba-Roma 5:12-15
Matheus 10:26-33



Khothatso

Le se ke le tšaba

Ka Hlatsuo re etsoa bana ba Molimo, 'me re itlama ho qala bophelo bo bocha ka ho furalla Satane, mosebetsi ea hae le likhahliso tsa hae. Ka Sakramente ea Tiiso, re fetoha bakriste ba phethehileng, lipaki tsa Kriste le baapostola ba hae. Ha re amohela liskramente tsena ka cheseho, kapa ha re nchafatsa lipallo tsa rona tsa Hlatsuo, re ikutloa re le matla re sa tšabe letho. Re tšoara lebone la rona, re ema hammoho le bakriste ba bang 'me re itlama ka lentsoe le phefa, re le pelo 'ngoe, re re: E, ke furalla Satane, mosebetsi ea hae le likhahliso tsa hae. Ke lumela ho Molimo Ntate, ho Mora oa hae le ho Moea o Halalelang.

Empa, kamorao ho litšebeliso tse tse mofuthu, ha re boela mahae, motho ka mong motseng oa habo, re qala ho teana le batho ba se nang cheseho eo re nang le eona, re hapjoe ke likhahliso tsa lefatše le ke menate ea lona; Satane ka boeena o re laletse 'me o re hohela ka meleko ea hae ea mofuta-futa.

Joale hangata re qala ho thothomela le ho tšoha. Re hopola hore na ba bang ba tla re'ng ha re sa ba etsise, re khutlela moo re tsoang teng, re sebeletsa lefatše le likhahliso tsa lona, re lebala hore re tšoaanetse ho ba leseli la lefatše, letsoai la lefatše, tomoso ea lefatše, lipaki tsa Jesu ea tsohileng bafung. Re tima lebone la rona, re hatekela letsoai la rona 'me re thetsetsa tomoso ea rona.

Lithuto tsa kajeno li reletsoe ho re matlafatsa hore re se ke ra oela molekong ona oa ho tšaba. Re fuoe mohlala oa moprofeta Jeremia le likhothaletso tsa Jesu ka sebele.

Jeremia e ne e e mohlankana ea lilemo li 23 h'a bitsoa ke Morena Molimo ho ba moprofeta oa hae ea sa tšabeng letho. Ruri, e ne e le pitso e thata-thata, hobane mehleng eo, marena, baprista le sechaba ka kakaretso, bohle ba ne ba lebetse Morena Molimo, ba ne ba thahasella lipolotiki tsa lefatše ho feta thato Molimo. Ba ne ba le tlas'a puso ea Babilona, 'me ba ne ba ntša khafa e boima ho babusi ba bona. Empa ba ne ba leka hore Egepete e ba thusetse ho itokolla jokong ea Babilona.

Ka taelo ea Molimo, Jeremia a bua a sa tšabe letho, a khalemela sechaba se khethehileng sa Molimo, se lahlieng Molimo oa sona. Ka baka la lipolelo tsena, a qala ho kena likhathatsong tse sa feleng. A tšoarora, a otloa, a kenngoa chankaneng, a phela bophelo bo thata har'a litsietsi tse ngata, ho fihlela h'a isoa Egepete 'me a bolaeloa hona teng ke Bajodi ba habo.

Ha re bala bukeng ea hae, re utloa mathata a hae: "Ba bangata b'a ntšeba, ba rata ho nqosa, ba rata ho mpolaea. Metsoalle ea ka ha e sa le eo. "Empa Jeremia o n'a tiisetse a matlafalitsoe ke pitso ea hae, a re: "Morena o eme le 'na joaloka mohale ea matla. Ka baka leo, ba ntoantšang ba sitoa ho atleha. Binelang Morena, rorisang Morena, hobane o namoletse bophelo ba mohloli liatleng tsa ba khopo."

Jeremia h'a tšabe letho hobane Morena o na le eena. O utloisisa hore leha lira tsa hae li ka mo hlola hona joale, qetellong Molimo ke eena ea tla hlola. Jeremia ke mohlala ho rona. Ka tumelo ea hae e tiileng ho Molimo o tsebile ho hlola mathata a bophelo. Rona re lehlohonolo ho feta eena, hobane re tseba hantle hore litsela tsa Morena ha se tsa batho. Re tseba hore mofoka o tla cheso mohl'a kotulo feela, le hore ba pele e tla ba ba morao. Re tseba hore Kalvari ke khoro ea leholimo.

Leha ho le joalo, leha re tseba thuto ea Jesu ea re boleletseng mohau o se nang moeli oa Molimo le boiphapanyo ba hae, le toka ea hae, hangata re tšoarora ke tšabo 'me re kopa tšireletso ea batho ho e-na le ho beha tšepo eohle ea rona ho Molimo.

Motho ea boi o tšaba ho se tšoane le ba bang leha ba fositse. O leka ho ithokisa molato ka ho re "bohle ba etsa joalo," "ha ke motho e mobe ho feta ba bang", "ke sebeletsa Morena Molimo boinotšing ba pelo ea ka." Athe, "nete ke hore o tšaba batho empa h'a tšabe Molimo. Tsela ea hae ke ea lafatše ha se ea leholimo.

Seo Jesu a se bolelang baapostola ba hae evangelizing, o se bolella rona. Hae ba re phela ka botšephehi ka ho ea ka thuto ea evangeli, re tla ba baapostola, hobane hangata liketso tsa rona tse ntle le tsona lipolelo tsa rona li tla fapana le tsa ba bang. Ka ho rata ba bang, le ho ba thusa, leseli la rona le tla khanya har'a lefifi. Likhothaletso tsa rona tse ntle, tse tletseng lerato le hlomphe e tla ba letsoai le natefising bophelo ba batho ba bang, mehlala ea rona e metle e be tomoso sechabeng kaofela. Ka lentsoe le le leng, re tla ba lipaki tsa Jesu, etsoe o re boleletse mantsoe ana a monate: "Mang le mang ea tla mpaka pel'a batho, le 'na ke tla mo paka pel'a Ntate maholimong." Empa le teng, o re boleletse mantsoe ana a boima, a thata a lokelang ho re tšosa le ho re thusa ho hlola tšabo: "Mang le mang ea tla ntatola pel'a batho, le 'na ke tla mo latola pel'a Ntate ea maholimong.

Bahalaleli har'a Beke

- 22 Phupjane Thomas More
- 23 Phupjane Joseph Cafasso
- 24 Phupjane Germoc
- 25 Phupjane Moloc
- 26 Phupjane Peterose le Paulosi
- 27 Phupjane Zoilus

Lizzy o kenella ka matla 'minong

Tšeliso Thakholi

Mino oa Amapiano o bonahala o runya ka matla a maholo le ho ratoa haholo ke bacha le batho ba baholo morao tjena, Ausi Mpolokeng Letuma ea tsebahalang haholo ka lebitso la 'Yung Lizzy', ke e mong oa bacha ba ikakhetseng ka setotsoana 'minong' ona, ka sepheo sa ho phethahatsa litoro tsa hae tsa ho iphelisa ka 'mino oa hae.

Puisanong le Koranta ena, o boletse hore 'mino esale e le talenta eo a nang le eona ho tloha bonyenyangeng ba hae. "Ho tloha ha ke ntse ke hola, esale ke rata ho binela lihlopha tsa kereke le tsa sekolo ho fihlela kajeno." A rialo. A re tlhase ena ea lerato la 'mino kahare ho eena e ile ea lokisoa haholo ke libini tseo a li ratang ka pelo eohle ea hae e leng mofu Bokang 'Moleli 'Malome Vector' le bo-ntate

Stanna. "Ke ha ke tla qala ho utolla talenta ena ea ka 'me batho ba e rata haholo."

A re o qalile a bina 'mino oa 'Rap' 'me pina ea hae ea pele e monate ka ho fetisisa eo a ileng a e hatisa ka 2020 e bitsoa 'Walking down the street.' A re ho feta moo o se a bina 'mino oa Amapiano e leng ona o seng o ratoa haholo ke bacha le batho ba baholo. O itse ho fihlela hajoale ha e-s'o be le CD ka lebaka la hobane a sa ntse a le kojoana li mahetleng, empa o hatisa lipina ka bongoe feela.

A kopa bafani le batho bohle ba boithatelo bo botle ho etsa letsoho la monna e le hore a tle a qetelle a ntšitse CD, kaha a se a e-na le lipina tse ngata tseo a li ntšitseng ka bongoe ho tloha h'a qala ho hatisa. A re morero o moholo oa ho ba e mong oa libini tse hloahloa tsa naha ena, ha se ho binela monate feela, empa ke ho etsa khoebo e tla mo phelisa.



sa. Ke ka lebaka lena a kopang lithuso ho batho bohle hore a tle a qetelle a hatisa 'mino oa hae e le hore a tle a tsebe ho phela ka ona. "Tšehetso ke ntho ea bohlokoa. 'Na ke sebetsa ka thata hore 'mino oa ka o khahle baji ba 'mino oa

Amapiano." Ho rialo Lizzy. Har'a tse ling tsa lipina tsa hae tse monate haholo ke 'Sheshisa mo-girl' le 'Njandolo e leng eo bacha ba e ratang ho feta lipina tsohle tsa hae.

A fera ka hore chebelo-pele ea hae e kholo kahar'a khoebo ea 'mino ke

ho bona 'mino oa hae o hlhalletse machabeng, a se a le boemong bo holimo bo ka thabeloang linaheng tse ling. A khothatsa bacha ka hore ba be le lerato le tiisetso ho holisa le ho matlafatsa litalenta tsa bona, kaha ha ho tse fumanoang li tonositse.

Lesotho le etsa mehlolo

Tšeliso Thakholi

Naha ea Lesotho e entse meka le mehlolo kahar'a linaha tsa lefatše tse 210 tse bapalang bolo ea maoto hore ka ho panya ha ntšhi, ebe e se e nyahlalitse boemo bo ka holimo ba bo145 e se e theohile ka khato e le 'ngoe ho ea ho 146, lethathamong la Mokhatlo oa Lefatše oa Bolo ea Maoto(FIFA), ha Mokhatlo oa Afrika oa Bolo

ea Maoto (CAF) teng e sa sisinyeha e ntse e le maemong a bo 44 har'a linaha tsa Afrika tse 54 tseo e leng litho tsa mokhatlo oa CAF.

Ho ea ka bahlopholli ba papali ea bolo ea maoto, Naha ea Lesotho boemo bona boo e bo fumaneng ka nako e khutšoanyane haholo, bo bakiloe ke tšebetso ea eona e sakang ea ebanthle lipapaling tsa eona tsa machaba tsa setsoalle, tse tsoa feta lipakeng tsa eona le Naha ea Kenya, moo e ileng ea bapala ka seahloho sa 1-1 lebaleng la Lucas

Moripe, Afrika Boroa ka la 4 Phupjane monongoaha papaling ea pele, ha ea bobeli e ile ea shapuo 4-0 ka la 7 Phupjane hona le baleng le tšoanang.

Tšebetso ena e ileng ea nyotobetsa Basotho ba bangata ke eona e behileng naha maemong ana a sa jeseng litheohelang ho CAF le FIFA. Sepheo sena se sa khahleheng sa Naha ea Lesotho ke sesupo sa hore na naha e eme joang, lipapaling tsa eona tsa boitokisetso ba litlholisano tsa Mohope oa AFCON 2027,

tseo leoto la pele le tlang ho thakhoha mafelong a Loetse. Litlholisano tse na li tla bapalloa linaheng tsa Uganda, Tanzania le Kenya ka 2027.

Ka lehlakoreng le leng tlhoho ena ea Naha ea Kenya e matlafalitse haholo mathathamong a CAF le FIFA. Ho e file monyetla oa ho matha mpetleke ho nyolohela boemong bo holimo, ha feela e ka boela ea fumana lipapali tse ling tsa setsoalle pele ho litlholisano tsa Mohope oa AFCON 2027 tseo e tlii'o li bapala. Maemo ana a macha a Naha ea Lesotho a hlaha tlasa mokoetlisi ea ntseng a le mocha haholo

oa naha e leng Bob Atang Mafoso.

Ha ho le joalo, Naha ea Lesotho thota e sa namme kapele ho eona ho ea fihla litlholisanong tsa AFCON 2027, 'me ke hona e sa tlii'o khikha pele. Haeba Lesotho le batla ho finyella ho makhaola-khang a bompoli ba AFCON 2027 isao le tlameha ho tiisa hore ho khoehlang, ha le tla be le nkana le Gabon mafelong a Loetse koano Afrika Boroa, moo le seng le fetotse lehae la lona. Ha ka Phato teng le tla nkhisetsana mahafi le Morocco hole le lehae la lona la Afrika Boroa.



Majara o'a ipabola Comrades Marathon

Tšeliso Thakholi

Khalala ea mabelo a mokoka ea mosali, Likeleli Majara o e ntse nalanane ka ho ba mosali oa pele oa Naha ea Lesotho hoba har'a ba leshome ba tsoileng khoeleng pele lebelong la bo-99 la Comrades Marathon, le neng le tloha Durban ho leba Petermaritzburg naheng ea Afrika Boroa ka Son-taha sa la 14 Phupjane monongoaha.

Likeleli o hlahile boemong ba borobeli lebelong lena la bolelele ba 86.1km ka nako ea 6:12:29, 'me a ikhapela khau ea Khauta le chelete e kaalo ka M58,000.00. Khalala ena ea Lesotho e qalile ho itokisetsa lebelo lena ka ho matha mabelo a joaloka; World's Most Beautiful Marathon, N12 Ultra 50km le The Ultimate Human Race leo e bileng eena mohloli.



O hlile a bontša boiphil-hlelo bo bohola, kaha a ile a bonahala hore mohlang a mathang Comrades Marathon o tla phahamisana folakha ea Lesotho. Mabelo ana le a mang ke ona a ileng a thusa ho 'meha boemong bo bottle 'meleng le kelellong, tlas'a tataiso ea mokoetlisi oa hae ea hloahloa Nick Bester, hore a tle a tsebe ho matha ka sekahla se nepahetseng ho fihla khoeleng ka nako.

Moroetsana enoa h'a ka

fumana tšehetso e hloka-halang a ka sebetsa hantle ho feta ka moo a sebelitseng ka teng. Naha ena e na le talenta e ngata papaling ea mabelo, eo bana ba Basotho ba ka tsebang ho iphelisa ka eona empa e hloka tšehetso e matla ka linako tsohle, ho tsoa ho 'muso oa Lesotho, bahoebi le bafani.

Ha ngata mabelong a boitokiso bohola ba limathi tsa naha ena ha li fumane letho. Ka hona litšenyehelo tsohle li ba

mahetleng a bona. Ena ke qholotso e etsang hore leha talenta e le teng ba se ke ba sebetsa hantle.

Mohloli lebelong lena ka ho basali e bile Gerd Steyn oa Afrika Boroa ka nako ea 5:44:53. Steyn le eena o entse nalane ka hoba mosali oa pele oa Afrika Boroa oa ho hapa lebelo lena ka makhetlo a mahlano a latellanang. Bobeling e bile Nobukhosi Tshuma oa Zimbabwe ka nako ea 5:53:36, borarong ea eba semathi

sa nako e telele sa lebelo la Comrades Marathon e leng Irvette van Zyl oa Afrika Boroa ka nako ea 6:02:30, eo le eena a seng a ile a le hapa ka makhetlo a mabeli. Ha maemong a bone e bile Shelmith Muriuki oa Kenya ka nako ea 6:06:38.

Haele ka ho banna Naha ea Lesotho ha ho le ea mong ea bileng kahare ho ba leshome ba ileng ba tsoa khoeleng pele, empa Teboho Sello o tsoile maemong a bo 17 ka nako ea 5:33:43. Mohloli oa lebelo lena ke George Kusche oa Afrika Boroa ka nako ea 5:15:56, bobeling ke Piet Wiersma oa Ned ka nako ea 5:19:36, borarong ea eba Mbuti Mollo oa Afrika Boroa eo e saleng a li hula pele ho tloha ha lebelo lena le qala, empa ea re h'a le likilomithareng tse tšeletseng a ileng a khathala. Ke ha Kusche a tla mo feta a nke boemo ba pele. Lebelo lena le ne le kenetsoe ke limathi tse hloahloa ho tsoa lefatše ka bophara tse 21,000 tsa mabelo a mokoka.

Mohope o haula balateli



Tšeliso Thakholi

Sekhahla seo litlholisanano tsa Mohope oa Lefatše o ntse o bapalloa linaheng tsa

Canada, USA le Mexico li qalileng ka sona, se hautse barati le batšehetsi ba papali ena e ratoang haholo lefatše ka bophara ea bolo ea maoto. Naha ea Lesotho ha ho

moo e hlahang teng litlholisanong tsena, kaha e iphetotse ntetekeng ngonan'a motšoare a otloang ke bohle, lipapaling tsa machaba. Ha li qala li thakhoha ka

la 11 Phupjane monongoaha mepukunyane e hlile ea bonahala, 'me e se e qalile ho salla mosalla ruri! Papaling ea pele ea Mokhahlelong oa A e neng e bula litlholisanano tsena Afrika Boroa e ile ea roba lipelo tsa barati le batšehetsi ba eona ha e ne e shapua ke Mexico ka phafa ea 2-0. Mokhahlelong o tšoanang moo ho pannoeng Korea Republic le naha e ncha e qalang ho kena litlholisanong tsena e leng Czechia ke ha Korea Republic e amohela baeti ka hoba shapa 2-1.

Mokhahlelong oa B e bile lipapali tse thata haholo, kaha Canada le Bosnia-Herzegavina le Qatar le Switserland kaofela ha tsona li ile tsa bapala ka seahlolo sa 1-1 papali ka 'ngoe. Athe Mokhahlelong oa C Naha ea Scotland e ile ea tsoa ka lesoba la nale ha e ne e hlohlora Haiti ka thupa e bohloko ea 1-0. Haele papali e neng e shebiloe ka leihlo le nchocho ea

Brazil le Morocco li ile tsa tšabana bophatšoa ka 1-1.

Mokhahlelong oa D ho ile ha tloa litlhase ha USA e ne e bontša hore noha ha e ke e qaloe mokoting ka ho tokhotsa Paraguay ka 4-1 ha Australia e ile ea iphetela mohoalotso ho Turkey ka ho e hlohlora ka phafa ea 2-0. Mokhahlelong oa E ke moo barati le batšehetsi ba bolo ea maoto ba ileng ba bona meka le mehloho ha Germany e ikutloisa monate ka ho teteka ntle ho qenehelo sehlopha se secha haholo sa Curacao ka phafa ea 7-1.

Mokhahlelong ona Naha ea Germany e bonahala e beuoe mothohong, kaha e pannoe le linaha tse kang Ecuador le naha e kileng ea tuma haholo ka papali ea eona e tsoileng matsoho e leng Ivory Coast, mehlang ea sebakali se kileng sa tsebahala haholo lefatše ka bophara ka papali ea sona e ntle e leng Didier Drogba.